

**Programa de bolsas Prácticas Fundación ONCE-CRUE para estudiantes
universitarios con discapacidad**

Convocatoria 2025-2026

Convocatoria da Universidade da Coruña

I. OBXECTO

A Universidade da Coruña (UDC) convoca 4 bolsas-prácticas FUNDACIÓN ONCE-CRUE dirixidas ao alumnado universitario con discapacidade igual ou superior ao 33%, co obxectivo de facilitar o desenvolvemento de prácticas académicas externas e promover así a mellora da súa empregabilidade e o seu futuro profesional.

Estas prácticas poderán ser desenvolvidas en grandes empresas, PEMES, microempresas, empresas de economía social, entidades do terceiro sector e outras institucións públicas e privadas

O réxime desta convocatoria axústase ao previsto no Convenio específico de colaboración entre CRUE Universidades Españolas e a Fundación ONCE para o desenvolvemento e execución do programa de bolsas-prácticas para o curso académico 2025-26 no marco do Programa de inclusión social, garantía infantil e loita contra a pobreza FSE+, 2021-2027; ao art. 14.5 do Real decreto 822/2021, do 28 de setembro, polo que se establece a organización das ensinanza universitarias e do procedemento e aseguramento da súa calidade; ao Real decreto 592/2014, do 11 de xullo, polo que se regulan as prácticas académicas externas dos estudantes universitarios e ao vixente Regulamento de prácticas externas do estudantado da UDC (aprobado en Consello de Goberno o 23 de abril de 2013 e modificado polos acordos do Consello de Goberno de 27/02/2015, 29/09/2015, 29/05/2018, 04/06/2019 e 03/11/2022).

II. PERÍODO DE REALIZACIÓN E DURACIÓN DAS PRÁCTICAS

As prácticas académicas externas a que se refire esta convocatoria poderanse desenvolver desde o día seguinte á publicación da resolución das persoas bolseiras por parte da Universidade da Coruña até o 31/12/2026.

Cada bolsa terá unha duración de tres meses. A distribución diaria establecerase de acordo coas características da práctica e a dispoñibilidade da entidade colaboradora. En calquera caso, os horarios serán compatibles coa actividade académica formativa, de representación

e participación que desenvolva o alumnado, polo que cómpre un acordo previo entre a empresa e a persoa bolsreira.

A realización das prácticas académicas externas non poderá levarse a cabo de maneira fraccionada. No caso de que, como consecuencia dunha enfermidade, agravamento da discapacidade, período de vacacións da empresa, mutuo acordo ou outra causa de forza maior debidamente xustificada, a persoa bolsreira non puidese continuar o desenvolvemento das prácticas, estas interromperanse, tras o cal poderán ser retomadas até completar o período de tres meses con data límite do 31/12/2026. O período de suspensión da bolsa debido ás causas nomeadas leva consigo a interrupción automática do pagamento da bolsa que se podería retomar unha vez que conclúan as causas da suspensión. Se o período de suspensión se prorroga máis aló do 31/12/2026, a persoa bolsreira deberá presentar a súa renuncia.

III. REQUISITOS DA PARTICIPACIÓN

1. Ter unha discapacidade recoñecida igual ou superior ao 33%.
2. Estar oficialmente matriculado/a, no momento da solicitude e do comezo das prácticas, en calquera grao ou máster (oficial ou propio) que imparta a UDC.
3. Ter superado o 50% dos créditos necesarios para obter o título de grao, incluídos, como mínimo, todos os créditos correspondentes á formación básica. No caso do alumnado de máster a porcentaxe anterior será do 25% no momento de finalización do prazo de inscrición.
4. Non manter relación contractual de tipo laboral, de prestación de servizos ou asimilable con ningunha empresa, institución ou entidade no momento do inicio das prácticas.
5. A bolsa é compatible con calquera outra axuda de carácter asistencial de natureza distinta ás axudas que son obxecto deste programa, calquera que sexa a súa orixe pública e privada a que poida acceder o alumnado, así como cunha posible pensión non contributiva por discapacidade, sempre dentro dos límites establecidos legalmente, así coma coas axudas que o/a estudante poida obter da empresa ou entidade de destino.
6. Para as prácticas curriculares estarase ao disposto no plan de estudos de cada titulación.

IV. DOTACIÓN DAS BOLSAS DA FUNDACIÓN ONCE

A Fundación ONCE efectuará o pagamento dunha cantidade de 2000 € por bolsa outorgada a cada estudante. Os/as estudantes recibirán 600 € ao mes durante un máximo de 3 meses e os 200 € restantes por estudante, cubrirán os gastos de asesoramento e apoio por parte da Universidade e gastos de Seguridade Social.

A achega da Fundación ONCE está cofinanciada polo Fondo Social Europeo no marco do Programa operativo de inclusión social, garantía infantil e loita contra a pobreza FSE+, 2021-2027.

Esta convocatoria está financiada con cargo á partida: 03.0A.24.06.85-422D- 480.00 do orzamento da UDC, condicionado á existencia de crédito axeitado e suficiente no orzamento para o exercicio 2026.

As cotizacións á Seguridade Social suxeitaranse ao disposto no Real Decreto-lei 2/2023, de 16 de marzo, de medidas urxentes para a ampliación de dereitos dos pensionistas, a redución da brecha de xénero e o establecemento dun novo marco de sostenibilidade do sistema público de pensións e o Real decreto lei 8/2014, do 4 de xullo, de aprobación de medidas urxentes para o crecemento, a competitividade e a eficiencia, así como ás posibles bonificacións ou exencións da Seguridade Social que puidesen existir en relación á realización das prácticas de persoas con discapacidade.

Esta convocatoria tramítase como expediente anticipado de gasto. Conforme co establecido no artigo 25 do Decreto 11/2009, de 8 de xaneiro, polo que se aproba o Regulamento da Lei 9/1007, do 13 de xuño, de subvencións de Galicia, a concesión de axudas queda condicionada á existencia de crédito axeitado e suficiente nos orzamentos da UDC para o ano 2026.

V. PRAZO DE INSCRICIÓN

Desde o día seguinte a súa publicación na Sede electrónica da Universidade da Coruña até o 10/12/2025.

VI. PROCEDEMENTO DE INSCRICIÓN PARA O ALUMNADO

1. O alumnado que desexe solicitar unha das bolsas a que se refire esta convocatoria deberá inscribirse no portal web do programa de bolsas Prácticas Fundación ONCE-CRUE, co enderezo <<http://becas.fundaciononce.es/>>, e achegar á nomeada plataforma informática o seu certificado de discapacidade, o seu currículum vitae e calquera outro documento que se lle requira a través dese ou doutro medio.

2. O alumnado matriculado nun mestrado cuxa titulación habilitante fose cursada noutra universidade deberá subir ademais á plataforma o expediente académico da titulación habilitante (grao ou titulación equivalente) coa nota media calculada sobre dez.

Aquelas solicitudes que non cumpran o procedemento anterior serán automaticamente anuladas.

VII. ASIGNACIÓN DAS PRÁCTICAS ACADÉMICAS EXTERNAS

A UDC asignará as bolsas entre as persoas candidatas de acordo cos principios de transparencia, capacidade e mérito. Conforme estes principios determinaranse, con carácter previo, os criterios cuantitativos que permitirán establecer o baremo das solicitudes tendo en conta estes elementos:

1. Grao de discapacidade oficialmente recoñecido.
2. Expediente académico.
3. Adecuación ao perfil solicitado na oferta por parte da entidade colaboradora e méritos expostos no currículo.
4. En caso de igualdade de méritos, daráselle prioridade ao alumnado de último curso, a aquel que non efectuase prácticas académicas ou a aquel que conte con outras circunstancias persoais e sociais que deban ser consideradas, segundo se reflicte na Convocatoria de bolsas Prácticas Fundación ONCE-CRUE 2025-2026.
5. No caso de darse ofertas de prácticas co duplo carácter curricular e extracurricular, terán preferencia as prácticas de carácter curricular.
6. Tras a asignación das prácticas, elaborárase unha listaxe de agarda e, no caso de que existan renuncias, a UDC acudirá á listaxe do alumnado solicitante admitido non bolseiro por orde de puntuación.

VIII. XESTIÓN DAS BOLSAS

A xestión destas bolsas levarase a cabo de modo coordinado entre a Unidade de Emprego da Vicerreitoría de Estudantes e Empregabilidade e a Oficina de Atención á Diversidade da UDC.

Finalizado o prazo de inscrición, publicarase no Taboleiro Electrónico Oficial da Universidade da Coruña (TEO) unha listaxe provisoria de persoas admitidas e excluídas e abrirase un prazo de 5 días hábiles que conta a partir do día seguinte ao da publicación,

para presentar reclamación e/ou achegar a documentación requirida, segundo o motivo da exclusión.

A Unidade de Emprego da Vicerreitoría de Estudantes e Empregabilidade elaborará unha listaxe de persoas candidatas, ordenadas segundo a súa prioridade e idoneidade, para lle remitir a cada entidade colaboradora. Estas persoas serán sometidas á valoración da entidade correspondente nunha entrevista persoal e de acordo con aqueles outros criterios que considere de aplicación no marco das súas políticas de realización de prácticas formativas. A adxudicación da bolsa estará sometida á aceptación da candidatura por parte da entidade colaboradora e unha vez seleccionada a persoa bolseira, a entidade colaboradora deberá enviar un correo electrónico ao enderezo <emprego.vee@udc.gal> cos datos desta persoa. As prazas adxudicaránse por rigorosa orde de chegada dos correos electrónicos. Posteriormente, a Unidade de Emprego notificará á persoa seleccionada que foi aceptada pola empresa.

A adxudicación da praza producirá os seus efectos o día da publicación da resolución. Contra esta resolución, que esgota a vía administrativa, poderá interperse potestativamente recurso de reposición ante o reitor dun mes, segundo dispón a Lei 39/2015, do 1 de outubro, do procedemento administrativo común das administracións públicas; ou ben recurso contencioso-administrativo ante o Xulgado do contencioso-administrativo da Coruña, no prazo de dous meses que contarán desde o día seguinte á notificación da resolución, ou calquera recurso que se estime procedente.

IX. FINANCIAMENTO DAS BOLSAS

A UDC recibirá a dotación das bolsas-prácticas da Fundación ONCE-CRUE cofinanciadas polo FSE en concepto de mecenado, ao abeiro do previsto na Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ao mecenado. Deberá destinar a devandita dotación aos seguintes conceptos:

- a) Pagamento dunha bolsa ao alumnado participante.
- b) Cumprimento das obrigas que, en materia de Seguridade Social, fiscal ou de calquera outro tipo, con carácter xeral, lle correspondan ou poidan chegar a corresponderlle por imperativo legal ou regulamentario á propia UDC en canto financiadora directa das bolsas.

Cómpre ter en conta a posibilidade de que estes importes poidan variar en función de se as prácticas teñen a consideración de curriculares ou non, posto que no primeiro caso, ao

abeiro do disposto na disposición adicional vixésimo quinta do Real decreto lei 8/2014, do 4 de xullo, ou calquera outra norma que o substitúa, modifique ou complemente no futuro, poderían estar bonificadas na cotización da Seguridade Social.

En calquera caso, será a UDC a que lle aboe ao/á estudante o importe correspondente á bolsa. Farao na conta corrente da entidade bancaria indicada pola persoa beneficiaria, da cal esta deberá ser titular ou cotitular. O pagamento efectuarase por mensualidades, de acordo coa normativa interna de xestión das prácticas académicas externas formativas.

No caso de que non chegase a completarse o período da bolsa, o alumnado bolseiro deberálle comunicar ao/á coordinador/a de prácticas do seu centro e ao equipo xestor deste programa a través do enderezo de correo <emprego.vee@udc.gal>. Se a finalización prematura é decidida polo/a estudante, e non resulta debidamente xustificada e/ou comunicada con antelación suficiente, a UDC poderalle reclamar os custos ocasionados. No caso de que a persoa bolseira abandone as prácticas ou renuncie a elas nun período de tempo inferior a oito días, non percibirá ningunha contía. Se por pedimento da persoa bolseira o período de prácticas rematase antes dos tres meses de duración mínima, recibirá o importe da bolsa correspondente ao período realizado de maneira proporcional.

X. INTERPRETACIÓN

Estas bases foron formuladas a modo de extracto dos termos e condicións xerais do programa a que se adhire para a súa participación a UDC, os cales prevalecerán en caso de litixio, discrepancia, cuestión ou reclamación resultantes da súa execución ou interpretación, sen prexuízo do previsto no parágrafo seguinte.

As actuacións administrativas dos diferentes órganos da UDC participantes neste procedemento serán recorribles, en canto se desenvolven no exercicio das súas competencias de dereito público, na forma prevista no artigo 112 e seguintes da Lei 39/2015, do 1 de outubro, o que se indicará nos acordos ou resolucións correspondentes; e, de ser o caso, de acordo coa Lei 29/1998, do 13 de xullo, reguladora da xurisdición contencioso-administrativa.

XI. INFORMACIÓN

Emprego UDC Campus de Ferrol
Edificio de Apoio ao Estudo
15403, Campus de Esteiro
Extensións: 3618, 3617, 3616
Correo electrónico:
<emprego.vee@udc.gal>

Emprego UDC A Coruña
Pavillón de Estudantes, 1º andar
15008, Campus de Elviña
Extensións: 2916, 2903
Correo electrónico:
<emprego.vee@udc.gal>

XII. PROTECCIÓN DE DATOS

En cumprimento do artigo 13 do Regulamento (UE) 2016/679, do Parlamento Europeo e do Consello, de 27 de abril, relativo á protección das persoas físicas no que respecta ao tratamento de datos persoais e á libre circulación destes datos (RXPd), e do artigo 11 da Lei Orgánica 3/2018, de 5 de decembro, de protección de datos persoais e garantía dos dereitos dixitais (LOPD), informamos que os datos que nos facilite a través da presentación dunha solicitude nesta convocatoria serán tratados baixo a responsabilidade da Universidade da Coruña (UDC), sendo os seus datos de contacto Rúa Maestranza 9, 15001, A Coruña, teléfono 981167000, correo electrónico rpd@udc.gal.

A finalidade do tratamento destes datos persoais é a convocatoria dunha bolsa de prácticas da Fundación ONCE para estudantes universitarios con discapacidade. Todas as persoas que entren en contacto con estes datos coa citada finalidade cumprirán o deber de confidencialidade establecido no artigo 5 LOPD. Estes datos trátanse durante o tempo imprescindible para cumprir coa citada finalidade, sen prexuízo da súa conservación en relación coa posible existencia de responsabilidades legais.

A persoa interesada consente expresamente no citado tratamento de datos aos efectos de cumprir coa finalidade descrita e terá dereito a retirar o seu consentimento en calquera momento, sen efectos retroactivos, salvo que o tratamento dos datos quede xustificado con algunha das outras bases de lexitimación contempladas no artigo 6 RXPd. Así mesmo, ten dereito a solicitar ao responsable do tratamento, en calquera momento, o acceso, rectificación ou supresión dos seus datos persoais e a limitación do seu tratamento. Tamén terá dereito a opoñerse ao citado tratamento, así como a solicitar, salvo casos de interese público e/ou exercicio de poder público, a portabilidade dos seus datos. Así mesmo, terán dereito a non ser obxecto de decisións individuais automatizadas, incluída a elaboración de perfís.

Tales dereitos poderanse exercer: destacadamente, a través do formulario para o exercicio dos dereitos en materia de protección de datos persoais, que se pode cubrir na Sede

Electrónica da UDC, no apartado de Outros trámites; ou mediante solicitude remitida (por correo postal ou a través dos Rexistros presencial e da Sede electrónica da UDC) á Secretaría Xeral, Reitoría da Universidade da Coruña, Rúa Maestranza 9, 15001 de A Coruña, ou ao correo electrónico rpd@udc.gal, coa referencia "protección de datos", a través dun escrito asinado achegando copia do DNI. Igualmente poderá dirixir esta solicitude á/ao Delegada/o de Protección de Datos, na mesma forma anteriormente indicada, ou ao correo electrónico dpd@udc.gal. Asemade, vostede ten dereito a presentar unha reclamación ante a Axencia Española de Protección de Datos (AEPD)."

Na data e lugar da sinatura dixital

O reitor

Ricardo José Cao Abad